



UN EUSKARAD WAR-ZU AR GELTED

14 / 11 / 2014 | A-NEVEZ, KELEIER BREIZH | EVEZHIADENN EBET



Peio Serbielle

Loc’het e oa Peio Serbielle evit ober e hent e bed ar sonerezh hag ar c’han. Met chomet eo a-sav gant e hent p’eo bet toull-bac’het evit bezañ bet roet bod da Euskariz ‘zo.

E 2006, goude daou vloaz en toull-bac’h e c’helle adkregiñ ganti, memes ma chome dindan evezh an archerien. Ha setu eñ oc’h embann e bladenn gentañ, Naiz, “Me a zo”, e fin 2007. Pelloc’h eget se e fell d’ar c’haner mont rak en e benn emañ dija an eil pladenn “Zara”, “Te a zo” a vo heuliet gant un deirvet, “Gara”, “Ni a zo”.

War hent ar Gelted

Evit an eil pladenn en deus dibabet mont war an hent evit kejañ gant an dud, er broioù kelt, e Breizh da gentañ, e Bro-Skos hag er Rouantelezh Unanet goude. Da gentañ en deus skoulmet gant tud bet anavezet gantañ gwechall, Gilles Servat, Karen Matheson... pe nevesoc’h zo evel Konogan an Habask. Pa soñje dezhañ eo ar vugale an dazont en deus bet c’hoant enrollañ mouezhioù bugale, skolajidi Diwan Gwened dindan renerezh David ar Gall, skolajidi a memes oad gant skolajidi ikastola Zurriola e Donostia – Sant Sebastian e kastilhaneg – ur skolaj a 1200 skoliad etre 2 hag 20 vloaz. Bugale all eus kostez Grenoble en deus lakaet en taol ivez, gant e ganaouenn diwezhañ, Sokamets, “Skriv da hunvre”. Adalek 2008 e lakae e raktres war an hent hag e miz Gwengolo 2013 e kroge gant an enrollañ dindan renerezh Patrick Bebey, e Gwened, e Donostia, e Angoulême, ha zoken e Bro-Skos.

Skignañ disheñvel

Abaoe m'eo bet embannet an 300 500 skouerenn gentañ e vez Peio Serbielle ingal war an hent evit lakaat e bladenn da vezañ anavezet. E Breizh e c'hell kontañ war skoazell Françoise Hinault, deus ar gevredigezh Novae. Asambles e klaskont tremen dre hentoù disheñvel diouzh an hentoù klasel. Mont a reont e darempred gant ar radioù "bihan", kinnig a reont da zDiwan gwerzhañ ar bladenn ha kaout evel-se un distaol a 25%... "Ar pezh a gont evidon eo mont da welet an dud, krouiñ darempredoù ha kenlabourat etre ar rannvroioù..." eme ar c'haner. Gant ar memes spered e kas al labour ivez e Bro-Euskadi.

Pelloc'h c'hoazh

Pell e wel Peio Serbielle. Goude ar bladenn Zara e vo unan all eta. Met ivez prezegennoù, arvestoù... Ijinañ a ra dija dont da ganañ e Breizh hag er broioù keltiek all. Ha c'hoazh enrollañ ha skignañ filmoù war an identelezh. "Dedennus eo eskemm etre ar rannvroioù. E Bro-Euskadi, da skouer, n'hon eus ket ar rouedad kafedioù-bro evel ho peus c'hwi amañ." emezañ.

Gant e bladenoù e fell dezhañ ober ul liamm etre ar broioù, etre ar yezhoù, etre an dud a bep seurt oad.

Evit gouzout muioc'h :

www.peioserbielle.com

www.facebook.com/zaralalbum.

Embannet gant HKRecords

